

HUMS akan Jadi Hospital Pengajar Pintar – Perdana Menteri

Terakhir dikemaskini: Jumaat, 02 Mac 2018 18:38 | [Cetak](#) | Jumlah paparan: 2475

Kongsi 0

Syorkan 0

Kongsi

Tweet

Share



JUMAAT, 02 MAC - Perdana Menteri Datuk Seri Najib Tun Razak mengumumkan Hospital Universiti Malaysia Sabah (HUMS) sebagai hospital pengajar pintar hari ini. Perdana menteri berkata, ia bagi melonjak kualiti pendidikan perubatan dan perkhidmatan kesihatan di Sabah.

"Kerajaan akan merealisasikan hasrat menjadikan HUMS sebagai hospital pengajar pintar secara berperingkat sekali gus memastikan hospital berkenaan dapat memberi manfaat kepada rakyat Sabah khususnya pelajar perubatan di universiti berkenaan.

"Kita (kerajaan) boleh menjadikan hospital pengajar pintar ini sebagai projek ikonik yang tidak hanya menguntungkan pelajar tetapi juga rakyat Sabah," katanya berucap melancarkan Projek Pembangunan HUMS di sini hari ini.

Turut hadir Ketua Menteri Tan Sri Musa Aman, Menteri Sains Teknologi dan Inovasi Datuk Seri Panglima Wilfred Madius Tangau, Menteri Komunikasi dan Multimedia Datuk Seri Dr Salleh Said Keruak, Menteri di Jabatan Perdana Menteri Datuk Seri Abdul Rahman Dahlan, Timbalan Menteri Pendidikan Tinggi Datuk Mary Yan Kain Ching dan Naib Canselor UMS Prof. Datuk Dr. D Kamarudin D Mudin.

Sementara itu, Datuk Mary Yap ketika berucap berkata hospital pengajar pintar itu bakal merealisasikan harapan UMS untuk memiliki hospital sendiri bagi kemudahan pelajar Fakulti Perubatan universiti itu menjalankan aktiviti pengajaran dan latihan klinikal.

Katanya sejumlah RM652 juta diperuntukkan bagi membina hospital itu dengan keluasan lantai 110,853 meter persegi yang mampu memuatkan 400 katil, dan pembinaan hospital itu juga adalah sebahagian daripada Pelan Pembangunan Pendidikan Malaysia (Pendidikan Tinggi) 2015-2025.

"UMS merupakan antara 12 daripada 20 universiti awam di Malaysia yang mempunyai Fakulti Perubatan. Setiap program pengajian (perubatan) di universiti memerlukan hospital pengajar sendiri bagi membolehkan pengalaman secara langsung diterapkan kepada pelajar.

"Selain sebagai hospital bagi proses pengajaran dan latihan klinikal pelajar perubatan UMS, hospital ini juga bakal memberi perkhidmatan kesihatan kepada masyarakat Sabah sekali gus melonjakkan lagi tahap aksesibiliti kemudahan kesihatan berkualiti untuk rakyat di negeri ini," katanya.

Datuk Mary Yap berkata pembangunan hospital pengajar pintar itu juga akan membawa pencetus perubahan selain menjadi pemangkin kepada pembangunan Sabah di era Revolusi Industri 4.0.

HUMS akan dibangunkan sebagai sebuah hospital pintar dilengkapi pelbagai kemudahan dan teknologi digital terkini termasuk rekod perubatan digital, integrasi antara peralatan perubatan dan bukan peralatan perubatan, bangunan, kelas dan dewan peperiksaan pintar.

Antara perkhidmatan yang bakal disediakan termasuk doktor pakar, pusat pembelajaran pelajar perubatan dan jururawat, perkhidmatan pakar ortodontik, perkhidmatan kecemasan dan trauma 24 jam, perkhidmatan pemeriksaan kesihatan pelajar, pusat farmasi, pusat diagnostik makmal dan pusat radiologi.

Perkhidmatan lain ialah penambahan mesin pusat fisioterapi, promosi kesihatan dan gaya hidup sihat,

perkhidmatan fisioterapi dan kecederaan sukan, perkhidmatan penguatkuasaan kesihatan, pemeriksaan pengendali makanan dan klinik berhenti merokok.

Sumber: BERNAMA